


TRUUKBLIK

2023



Prins Stefan 1^e en Prinses Lillian 1e

Allein same hōbbe veer de grootste sjpas!

*"Sjpringe, sjoenkele, danse en zinge,
pak uch noe mer vas.
Want allein same
hōbbe veer de grootste sjpas!"*

Truuk dènkend aan vastelaovend 2023 - veur ós ein hièl biezónger editie - waor niks gelaoge aan 't lètste deel van ós motto: "Allein same hōbbe veer de grootste sjpas!". Wat hōbbe veer d'r van genaote um same mèt de Raod van 11, familie, vrung en alle luuj die vastelaovend leef hōbbe, de vastelaovend te kinne viere!

'T avontuur begós mèt 'n appje. Verras en verièrd waore veer. Dat veer daonao nog angerhauf jaor moste wachte..., dat hauw nemes veurzeen. Eine daag nao de eupening van 't carnavalssezoen woord 't nuuj jeugprinsepaar oetgeroope: jeugprins Teun I en jeugprinses Lana I. "Oetkieke mèt ós reactie tussje 't publiek. Veer motte nog ein waek op ós tong biete..."

19 november 2022 waor 't eindelijk zoa wied; de prinseproklematie wao veer zoa langk nao toe hōbbe gelaef. Wao veer gebruukelik enthousias, mer op ós gemaak, 't nuuje prinsepaar aansjouwe, waor 't dit kièr ein daag van nerveuze oere en vāöl iesbaere. 'T haet de ontlading naodat van èlf nao nul waor aafgetèld allein mer groater gemaak.

'T seizoen is umgevlaoge. Ein bomvol program haet d'r veur gezörg dat veer ós van de ièsjte tot de lètste minuut hōbbe geammezeerd. Dat kaom umdat veer vanwege de gooj veurbereidinge door de Raod ós nurgus euver hoofde te becommere.

Herinneringe hōbbe tied nuèdig. Ongerwiel dat ste aan 't viere bès, maakse sjpas en plezier, verkupse elkaar sjaele kal en geisse wie ein rakèt. De hubs op dat momènt gein tied um op dien gemaak te euverdènke wie sjoan en uniek 't allemaol is. Dae tied veur herinneringe is inmiddels aangebraoke. 'T truukdinke maak de toen al sjoan momènte nóg sjieker.

Zoa zin veer op de aovend van de recepsie euverdonderd door 't aantal luuj en vereniginge die de twiè nuuj prinsepare van De Beumerwalders zin kaomme felicitere. Veer zin auch dankbaar dat veer de aovend bie 't Tiènde Riek en de carnavalsmiddège bie de oudere en zorgbehoevende höbbbe maoge biewone. Versjillende zittinge binne 't dörp en meinig activiteit boete 't dörp höbbbe wiejer veur ein neet te ondersjatte aanluip nao de drie dol daag gezörg. Door de gasvrieheid van de kasteleins höbbbe veer auch dees daag op ein gooj maneer kinne sjtarte én aafsjeete in ós Beumerwald.

De drie vastelaovesdaag leepe veur ós geveul naadloos inein euver. Veer motte noe nog af en toe naogoon op welke daag veer wat precies allemaol höbbbe belaeft. Veurdatt veer 't ech in de gate houwe, waor 't alwèr dinsdigaovend en waor 't aaftèlle begós. Dit kièr veur 't eind van de vastelaovend. Jaommer, want 't is zoa sjnel veurbie gegange. Mer auch good, want alles wat leuk is, geit sjnel.

Veer höbbbe genaote van de vastelaovend 2023, veer genete nog ummer nao en veer zin ein onvergaetelikke ervaring rieker. Dankbaar en gruètsj zin veer. Dankbaar veur de kans die ós is gebaoje. Dankbaar veur de meujte die de Raod en de rest van de Beumerwalders numme um de vastelaovend op een gooj maneer te organisere. Dankbaar veur 't sjoan jeugprinsepaar dat dizze vastelaovend mit ós haet wille viere. Gruètsj op ós familie en vrung. En neet te vergaete gruètsj op alle luuj in 't Beumerwald die de vastelaovend same tot ein groot fiès make!

Volgend jaor zeen veer d'r wèr bie. Zónger sjteek en zónger kruèntje, mer mèt aeve vööl enthousiasme en gooj zin. Auch dan höbbbe veer wèr same de grootste sjpas!

Prinsepaar 2022-2023
Stefan I & Lillian I